

NGO: Pelantikan Khusrin langgar hak rakyat S'gor
Malaysiakini.com
January 14, 2011

Sebuah kumpulan pendesak baru merancang untuk mengadakan perhimpunan Ahad depan (23 Januari) bagi membantah pelantikan Datuk Mohd Khusrin Munawi sebagai setiausaha kerajaan negeri Selangor yang baru.

Hormati Suara Rakyat Selangor (HSRS) berharap dapat mengumpulkan sekurang-kurangnya 10,000 orang ke perhimpunan itu yang dijadual diadakan di stadium MPPJ di Kelana Jaya.

Jurucakap kumpulan itu, Haris Ibrahim berkata, perhimpunan tersebut bertujuan memberi tekanan kepada Ketua Setiausaha Negara, Tan Sri Mohd Sidek Hassan supaya menarik balik pelantikan Khusrin.

"Pelantikan Khusrin adalah kemuncak percubaan kerajaan persekutuan BN bagi menafikan rakyat Selangor mendapat khidmat terbaik dalam pentadbiran negeri oleh kerajaan persekutuan Umno-BN.

"Rakyat Selangor pada 8 Mac 2008 telah mengundi dan membuat pilihan. Apa yang kita lihat hari ini ialah insiden, gerakan untuk memandang rendah pilihan rakyat Selangor.

"Insiden terbaru pelantikan SUK ini hanya membimbangkan lagi rakyat Selangor kerana walau telah memilih Pakatan Rakyat, ada usaha pihak lain mengganggu dan merendahkan Kerajaan Negeri Selangor" kata Haris pada sidang akhbar di Dewan Perhimpunan Cina KL-Selangor di ibu negara hari ini.

Selain itu, katanya, perhimpunan berkenaan akan juga memberi tumpuan kepada isu tempatan yang tidak dapat diselesaikan kerana tiada kerjasama dari kerajaan persekutuan melalui agensi mereka seperti Jabatan Kerja Raya (JKR), Polis Di Raja Malaysia (PDRM), SYABAS serta agensi lain.

HSRS merupakan gabungan NGO yang memperjuangkan hak rakyat dan keadilan seluruh negara.

Antara NGO terlibat ialah Bersih 2.0, Jaringan Rakyat Tertindas (JERIT) Saya Anak Bangsa Malaysia (SABM), Jemaah Islah Malaysia (JIM), Malaysian Civil Liberties Movement (MCLM) dan beberapa lagi.